



VERSCHNUUFFER

www.verschnuuffer.ch

Fasnacht 2014

Wämmer Kommissionen mache?

Mechtsch z Basel Kommissionen mache
no isch das wirgglig nid zem Lache:
Mit Shoppe het das gar nyt z tue,
nai, d Politik kunnt do derzue

Fir jeede Mischte – es isch e Hoon –
git s irgend so-n-e Kommission,
wo s jeede Wichtibutz ka gniesse
im gschützte Rahme Saich z beschliesse.

S wird Schigganiere so zem Zwägg,
das schläggt kai Basler Geiss ewägg!
Au d Willkür wird mit Liebi pfläggt,
dr gueti Ruef voll Freud verdräggt.

Natyrlig mechtsch jetz Bischbyl heere,
wo-n-ys grad alli bsunders steere.
S isch kai Problem, kasch Dir s jo dängge,
e baar Exämpel aanezhänge:

Als Erschts wär sicher do z erwääne
- denn die isch wirgglig völlig dääne –
die Kommission, wo d Nachtrue pfläggt
und d Trottoir zoobe-n-uffe gläbbt.

Als näggschti - au top in däm Renne –
mien mir die Kommission benenne,
wo gezyllt sich geege Lärme weert,
dermit är ys uf kai Fall steert.

Das wär jo eigentlich ganz toll,
vor lutter Loob gsächtsch ys randvoll,
nur finde mir s schwär deplatziert,
dass die als Comité fungiert.

Die ainzig vo de Kommissionen,
wo s voll Derby-Syy sich duet loone,
wo Loob und Freud bikunnsch als Loon,
isch unseri Sujet-Kommission.

E Love und Friide Kommission
bemieht sich lieb fir d Religion.
Kasch Fundis und au Terrorische
so us der Gmainschaft uusemische.

Als schwarzes Loch, wo d Stadt bedroot,
verschlingt si alles, wo nur goot:
Eb schlaue, eb glatt, es isch der Hoon
killt s d Basler Stadtbildkommission!

E Rieplibueb isch Presidänt:
Frisch wyss besoggt mit bruune Händ
heersch ihn als schallend uuselache,
dass är die Stadt ka fertig mache!

Denn git s no d Kommission fir d Beize:
Ganz bsunders duet s Problem die reize
vo Plastik-Stiehl, wo differiere,
drum derfsch die dusse nid serviere.